

四庫全書

集部

欽定四庫全書

文章辨體彙選卷十三

明 賀復徵 編

制二

冊皇太子制

王言會最

黃門朕聞王者神器天之大業震百里而崇孟侯照四方而建元子其所由來尚矣我國家參天兩地濟以豐功祖武宗文承於密命顧循菲德寅畏鴻名太上皇命

朕以位卿大夫補朕之闕僉謂率先自爾稽古惟新國
本之大不可以不務皇儲之重不可以不立故宵衣當
寧聞義是將朝服升階擇賢而舉皇太子嗣謙生知禮
樂性成仁孝字孫之愛則敬不絕馳問豎之安則恭而
至寢觀其言精視牘思敏題鞭固已覈東序之討論契
南山之調護今少陽踐位獻歲發春草樹自樂乾坤交
泰副君之榜已別其宮太史之書更藏於府帝圖斯永
人望所歸庶符知子之明豈獨在予之慶用施寬惠光

於政理今望苑初開端條是切天下有高才懋德碩學
純儒比迹春卿齊名夏綺具以徵辟

封皇太子大男寧平原郡王等制

王言會最

勅王者嗣統必上尊祖廟中立人紀下及諸孫所以光
贊鴻猷發揮大典者也皇太子大男寧等溫敏茂淑依
仁游藝韶齔之歲自降其心詩書之言夙盈於耳朕初
建儲貳永固宗祧既當知子之明彌稱抱孫之慰是用
依方建邑籍土疏疆俾奉邦家式崇藩屏本支百代冀

邁於周詩子弟畢封更高於漢室於戲承紫極之慶稟
青宮之訓惟師友是敬惟忠孝是憑以樂善為心以好賢
為德古有成範爾其欽哉

授鄭涵考功郎中馮宿刑部郎中等制

玉堂遺範

敕二帝三王之所以仁聲無窮績用明而刑罰當也尚
書郎專是兩者疇將若予僉曰前國子博士充史館修
撰鄭涵文無害可以彰善惡守歙州刺史馮宿思無邪
可以盡哀敬庶尹百吏之能否四海九州之性命用汝

參斷汝其戒之夫刻則害善放則利淫僻則不通流則
自撓惟是四者時考之難亟則失情緩則留獄深則礙
恕縱則生姦惟是四者時行之難八者不亂然後可以
有志於理矣朕實注意爾其盡心涵可考功郎中宿可
刑部郎中餘並如故

授令狐定右散騎常侍制

玉堂遺範

勅前西川節度副使令狐定夫言語侍從之臣朝夕論
思獻納必求明誠端厚文而不佻者以備吾之顧問今

以定業茂儒素道光縉紳恬於晉取之機鬱有貞方之
譽踐歷華貫周旋正途佐台席而籌畫居多登副車而
聲猷甚暢從知既久畢志方歸嘉其委雉之誠寵以附
蟬之貴阮貂換酒潘直逢秋既榮高閣之居亦有達人
之美勉思清切以遂優游可依前件

郭子儀兵馬副元帥制

唐賈至

制昔伊尹與湯合傳說與高宗合尚父與周公合故哲后
良臣莫不至合非賢不久有開必先久大之業也公上

畧宏才惇信明誼受我旄鉞輯寧區夏典器銘勲高視
前古實邦家之傑豈獨為予社稷之衛可獨弼予節制
咨謀安危斯屬懼朕之不稱也往欽哉司空子儀可兵
馬副元帥主者施行

授韋綬禮部尚書薛放刑部侍郎丁公著工部侍

郎等制

賈至

敕尚書左丞韋綬等朕以東宮時先皇帝垂慈聖之德
念予冲蒙選端士通儒使講貫今古自禮樂刑政暨君

臣父子之道博我約我日就月將俾予於今不至牆面
克荷丕訓大揚耿光實綬放公著之力也故朕嗣位未
踰時月或自郡邸或自省署徵擢寵用為丞郎給事中
官雖超拜職亦具舉師道光而心愈讓人爵貴而身益
恭宜更褒升重酌輔導以綬精粹辯博有先儒之風可
作秩宗以放端明慎重行君子之道可居憲部以公著
檢敬規度得有司之體可貳冬官於戲貞百工平五刑
典三禮皆重任清秩予無愛焉蓋欲表二三子道不虛

行而明予一人德無不報也綬可禮部尚書放可刑部侍郎公著可工部侍郎餘官並如故

加裴度幽鎮兩道招討使制

元稹

門下夫以區區秦伯而猶念晉國曰其君是惡其人何罪况朕均養億兆為之君親燕人冀人皆為乳哺而育之者安忍以豺狼驅脅之故絕其飛走盡致網羅止行犯命之誅是用開其一面具官裴度昔者區域之中蜂蟻巢聚蔡有逆孽齊有狡童厥初圖征疑議滿野不懼

不惑挺然披攘苟無司南允罔能濟佑我憲考為唐神
宗實賴股肱運用心力肆朕小子蒙受景靈冀服於前
燕平於後而撫馭失理盤牙復生求思弭寧中夕有得
國老尚在夫何患焉是用亟宣懇惻之誠就加招撫之
命於戲頃者師道元濟乘累代襲授之資藉山東結連
之勢以丞相布畫於千里之外使諸將持重於四封之
中而猶劉悟裂虵豕之驅李佑潰鯨鯢之腹蓋逆順之
情異而忠孝之道明也況彼幽鎮無名暴征以丞相近

觀其宜以諸將齊奮其力斧鑕之刑坐迫椒蘭之氣外
薰誰不自愛其生焉能與亂同死庶宜開懷緩帶以待
其歸

加裴度鎮州四面招討使制

元稹

門下傳云死者不可復生刑者不可復續是以先王斬
一枝指殺一犬屍莫不伏念隱悼至於旬時決而行之
蓋不得已也予於鎮人亦既伏念俟其悛革詎止旬時
乃命相臣招懷撫諭矜其誑誤示以生門期於盡脫網

羅豈可驅之陷穽而豺狼當道荆棘牽衣雖欲歸於有
仁厥路無由而至況王師壓境義勇爭先朕每抑其鋒
銑未忍覆其巢穴是猶愛稂莠而傷稼穡養癰疽以潰
肌膚獨懷兒女之仁慮失祖宗之典今上台居鎮算畫
無遺操晉陽之利兵驅屈產之良馬舉河東義武之衆
合滄景澤潞之師當元翼受命之初乘田布雪冤之頃
舉毛拾芥其易可知兼用威恩尚存招致宜令河東節
度使裴度充鎮州四面招討使於戲以一城之卒敵天

下之師徇猖獗之徒抗君父之命吾哀爾輩死實無名
苟能自新亦冀容汝主者施行

授李愿檢校司空宣武軍節度使制

元稹

門下昔者魯侯伯禽徒以周公之故遂荒大東重耳以
定傾之勞子孫不絕於晉昔我太師西平王在德宗時
能復京邑書於鼎彝每懷宗廟之安實念江山之永而
又繼有英哲克全令人惟弟惟兄莫非頗牧尚想德施
於十代何憚恩積於一門具官李愿生長紈綺之中而

素風自得蘊鬱驍勇之器而性與溫恭怡怡於叔季之間翼翼於班行之內始為夏帥遂著能名蹄角齒毛之良一無取於夷落而不貪之實大布於朔陞旋領徐方會征淮右隣寇陰狡將助鴟張來犯東郊冀延晷刻爾乃提持戈戟淬礪卒徒一戰而蜂蠆盡殲不時而鶚獍就戮聿來岐下號令益明繕完甲兵為我保障朕以浚郊重鎮尤藉良材俾為司空以表東夏持我邦憲用清爾人夫四海九州非不廣也然而靈武魏博至於大梁

斷長補短方數千里皆爾為政又何加焉於戲睢陽在
爾之東張巡效忠之城未毀夷門在爾之境侯羸報恩
之跡尚存又安知憧憧往來之徒不有以仁義匡於爾
者爾服休命其惟戒之

授田布魏博節度使制

元稹

門下經曰父母之仇不同天雖及匹士而猶寢苦枕干
以期必報是以子胥不殉伍奢之死卒能發既藏之墓
鞭不義之屍取貴春秋名垂萬古而況於身備將壇父

死人手家仇國恥併在一門當懷嘗膽之心豈俟絕漿
之禮金革無避其在茲乎具官田布咨爾先臣惟國元
老首自河朔來朝帝庭而又東取青齊北討燕趙提挈
義旅勤勞王家冒白刃而不疑推赤心而自信屬冀方
求師余所重難輟自大名付茲巨鎮而中台暗折上將
妖侵蠱賊潛窺於腹心豺狼勃興於肘掖人神憤痛朝
野驚嗟深軫予懷誓擒元惡以爾布詩書并習忠孝兩
全常用魏師克征淮孽素行恩信共著勲庸豈無奮激

之圖為報寇仇之黨且魏之諸將由爾父而崇高魏之
三軍蒙爾父之仁愛昔既同其美利今豈忘其深冤爾
其淬礪勇夫敬恭義士一飯之飽必同於士卒一毫之
費必用於戈矛非算畫不萌於心非軍旅勿言於口居
則席藁寒則抱冰以喪禮處之若哀心感者必有為橫
身刎頸感智捐軀下報營魂旁清醜類於戲至誠可託
稔惡難逃矧彼凶殘去將安往墨線在體玄纁在前提
劍執金無忘哀敬

授牛元翼深冀等州節度使制

元稹

門下鷹隼擊則妖鳥除弧矢張則天狼滅湯沐具而蟻
蟲相弔針石熾而瘡疽立潰苟得韓盧而示之狡兔則
可備俎豆而俟脯醢矣復何憂於越軼乎夫將者亦蟻
虱之湯沐而渠魁之韓盧也我得之矣又何患焉具官
牛元翼挺生河朔之間迴鍾海岳之秀幼為兒戲營壘
已成長學神樞風雲諳曉衆推然諾已任安危善用奇
兵尤精攻擊陳安之矛丈八顏高之弓六鈞或山立於

軍前或肉飛於馬上而又謙能養勇孝以資忠雖膽力
過人而心誠許國自常山作沴上將罹災慟哭轅門誓
清妖孽羽書三奏驛騎四馳上請廟謀旁徵隣援指期
斬叛克日圖功斷自予衷開懷用爾夫以爾之才力而
取彼之凶殘是猶以火焚枯以石壓卵螳臂拒轍鷄肋
承拳萬萬相殊破之必矣而況於鎮之黎人皆朕之赤
子爾之部曲即鎮之卒徒聞爾鼓輦之音懷爾椒蘭之
德吾知此輩誰不革心爾其寒者衣之飢者食之無發

室廬無害農稼苟獲戎首置之藁街下以報忠臣之冤
上以告先帝之廟則蚩蚩從亂予又何誅於戲殺人盈
城爾其深戒孥戮誓衆朕不忍言再換蟬冠新持武節
恩不虛授爾其敬之

授韓臯左僕射制

元稹

勅夫一邑之政而猶資老者之智用壯者之決况朝廷
之大得不以耆年重望居表正之地儀刑於百辟乎惟
爾具官韓臯始以直言事代宗皇帝司諫諍復以文章

政術事德宗皇帝為舍人中丞京兆尹在順宗憲宗時
出領藩方入備卿長逮予小子歷事五君勤亦至矣而
又處權近之際未嘗以恩幸自寵於一時當趨嚮之間
終不以薄厚見窺於衆目豈所謂徐公之行已有常而
詩人之風雨不改耶日者銓覈羣才兼勞揆務頗煩倫
擬有異優崇罷去職勞正名端右俾絕積薪之歎且明
尚齒之心凡百庶寮無忘咨稟

授栢耆兵部員外郎制

元稹

勅具官栢者朕聞亟遷則曩倫斃滯賞則勞臣急兼用
兩者謂之政經夫南憲右掖至於中臺我朝之極選也
俾爾環歲之內周歷茲任豈無意焉元和中盜殺丞相
賊傷議臣齊冀之間交以禍端相嫁者自青溪寧中提
轉九押闔之書馳於諸鎮使承宗疑否隔塞一朝豁然
納質獻地克終於善承宗既歿承元授事者又將朕教
告命於承元萬衆無譁一方底定此而不錄將何以勸
凡百多士無忘急病之心

授劉士涇太僕卿制

元稹

敕卿寺甚重不易其人或以勲以親以報以勸又何愛
焉具官劉士涇去歲西戎跳入涇上京師戒嚴朕慨然
有思廉頗李牧之志而習事者言爾父司空之在涇也
築平涼等八城二堡塹保定平原使涇人益樹麥禾以
復后稷公劉之教十有六年犬戎不敢東顧朕聞其人
思見其後果有令子在吾懿親與之討論亦自奇士鋪
陳將畧殊有父風訪其班資則曰亞諸卿之間嘗十年

矣今乃除其憂服命以太僕豈惟報爾先臣榮吾戚里
亦欲使緣邊諸將顧其愛子為我竭誠

授王溥李逢等太僕少卿制

元稹

勅具官王溥李逢等昔我憲宗章武皇帝法堯睦族深
惟本枝乃詔執事曰伯父叔季幼子童孫在屬籍者必
命卿長以才行聞而溥等國族之良雅副茲選糾訓羣
僕允釐王官各率迺誠無替厥職溥可權知太僕少卿
逢可守袁王府長史餘如故

授張籍秘書郎制

元稹

敕張籍傳云王澤竭而詩不作又曰采詩以觀人風斯亦警予之一事也以爾籍雅尚古文不從流俗切磨諷興有助政經而又居貧晏然廉退不競俾任石渠之職思聞木鐸之音可守秘書郎

授于季友羽林軍將軍制

元稹

勅具官于季友天子六軍必有材官欽飛超乘挽彊之士在馬董之以威待之以信分八舍之衆寡均二廣之

勞逸不異不揚不掉不挫皆將軍之令也是以李大亮
上直禁中而文皇甘寢則腹心爪牙之任斯不細矣以
爾季友時予舊姻念往興懷度才思用榮以服色列於
藩垣爾其敬恭無替朕命

授盧士玫權知京兆尹制

元稹

勅朕日出而御便殿召丞相以下計事而大京兆得在
其中非常吏也誠以為海內法式自京師始輦轂之下
盜賊為尤尹正非人則賢不肖阿枉奏覆隔塞則上下

不通假以恩威用讐豪右朝散大夫守京兆尹知府事
盧士玫自居郎署執政者言其溫重不回守法專固副
內史行事物議歸之日者景陵將建龜筮有時予心怛
然懼不克濟爾嘗倅職應其供求和而不同儉而不隘
竣於已事朕甚嘉焉試命元寮亦既不撓今圓丘甫及
慶澤將施抄剽椎埋必有幸生之者案牘卒吏亦當因
緣為姦公費則多而利不下究惟是數者爾司其憂為
爾正名無恡操剽

授薛昌朝絳王傅制

元稹

勅薛昌朝等國有政職之要其一曰具員所以稽績用而昇秩序也爾等典掌衆務勤歷歲時無畏厥官能舉其政擇才以佐諸郎選士以歷東朝亦吾蘊崇本枝之意也爾無易之可依前件

授唐慶萬年縣令制

元稹

勅朝議郎守尚書比部郎中賜緋魚袋唐慶輦轂之下豪黠僥輕擾之則獄市不容緩之則囊橐相聚是以前

代惟京令得與御史丞分進道路以其捕逐之急也執
事言爾慶頃推束池鹵生息倍稱布露飴散飴鹽散鹽
見周禮
於羅落之間而盜賊終不敢進推是為理真吾所求之
劇令也無或畏避以艱惛整

授韋珩等西畿令制

元稹

勅具官韋珩李鄂等昔先王青災肆赦則殊死以降無
不宥免而受財枉法者常罪罪之以此防吏吏猶有豪
奪於人者朕甚閔焉日者覃懷有過籍之賦使吾百姓

無聊生於下非珩等為吾發覺則吾終不得聞東人之疾苦矣今美原藍田皆吾畿內之邑爾其為吾養理生息以惠困窮使天下長人之吏知朕用廉激貪之意焉珩可美原令鄆可藍田令

授元興等杭濠歙泗諸州刺史制

元稹

勅朝散大夫守饒州刺史元興等自天子至於侯甸男邦小大之勢不同子育黎元其揆一也是以郎官出宰百里牧守入為三公此所以前代稱理古也近俗偷末

倒置是非省寺以地望自高郡縣以勢卑自劣盤牙不
解稂莠不除比比有之患皆由此起今餘杭鍾離新安
順政三有財賦一隣戎狄將有所授每難其人以興之
理課甄明以弘度之奏議詳允以學亮之學古從政以
達之守道立身僉命為邦庶可以勝殘去殺矣各奉詔
條用慰甄獨可依前件

授崔元畧等加階制

元稹

勅崔元畧等階之設二十有九有庸有事有叙有加用

是四者以詔百吏由郾而上至於元畧曰加曰敘由漚而下至於弘景曰事曰庸光我侍從之臣且優致政之老詔賢詔德於是乎在堂與益近爾其敬之可依前件

韋行立可處州刺史制

元稹

勅具官韋行立聞爾貴遊之子也出入省寺二十餘年終無尤違斯亦鮮矣江南諸郡戶籍非少皆有賦入之艱爾為吾往理緡雲以宣朕化無虐悖獨俾傷惠和

李翊起復仍前監察御史制


元稹

勅具官李翊比制多以詳練法理者行於御史府或滿
歲即真或不時署位亦試可之義也以爾翊文學周敏
操行端方執喪有聞俯以就制復爾故秋勉修乃誠

授劉惠通內謁者監制

元稹

勅具官劉惠通愿吾愛之俾在左右將我密命達於四
方去盡行人之詞還致諸臣之復言必忠信事無尤違
使朕不出戶而知三軍之志者爾有力焉深念其勤將
以為報階秩兼進用示恩榮各依前件



文章辨體彙選卷十三

欽定四庫全書

集部

文章辨體彙選卷十四至

詳校官中書_臣金應琦

主事銜_臣徐以坤覆勘

總校官檢討_臣何思鈞

校對官編修_臣勵守謙

謄錄監生_臣于時和

欽定四庫全書

本朝辨體彙選卷十四

明 賀復徵 編

制三

授張弘靖門下侍郎平章事制

唐白居易

門下夫佐佑天子變理陰陽平章法度登進賢哲外撫
夷狄內安元元使百官各修其職一物不失其所此宰
相之任也朕思得良弼訓致此道咨命予汝其殆庶乎

具官張弘靖惟乃祖乃父代居相位咸有成績於旂常
爾其忠正恭肅文以禮樂日濟其美振揚家聲一時之
人謂之才子亟登清貫益著令聞洎出刺陝部移鎮蒲
坂政不苛細甚得人心寮吏將卒皆樂為用清簡之化
聞於京師由是鄭風緇衣之好漢廷立成之美朝望時
議翕然與之人謀既同朕志亦定乃用登爾以左輔援
爾以大政尚克欽乃嘉命業乃代官竭其股肱服我前
訓嗚呼三代為相邦家之光爾其敬哉無替乃前人之

徽烈

授范希朝京西都統制

白居易

門下閭闔風至太白星高謀帥護邊國之大計具官范
希朝忠貞勤儉以為質惠和智勇以為用一代名將三
朝信臣朕以西邊列鎮三四若有總統則易成功思得
良帥有威名者并護諸將歲一巡邊乘秋順令揚其威
武則南牧之馬引弓之人知我有備不戰而去誰可任
者無如希朝以爾有朔方之勞有振武之効功在疆場

名聞羌戎惟實與聲皆副是選今拜爾為大將尊爾為
司徒節制進退一令諮稟倚望如右可不慎歟可充西
京都統

李愬贈太尉制

白居易

勅具官李愬在建中歲泚賊叛逆惟太師晟實伏大順
翦而誅之在元和朝蔡寇充斥惟爾愬實奮奇策虜而
戮之父子之功書於甲令俱為第一焯輝當時矧爾一
登將壇六換鈇鉞坐論巖廊之道卧理保傅之事方深

倚望奄忽淪謝是用當食累歎視朝三輟豈不以爪牙
之威缺於外股肱之痛軫於中者乎而弔奠之命賁賻
之數雖加常等未表殊恩宜以太尉之秩尊上公之袞
俾爾被哀榮服忠孝從先太師於九原也不其盛歟嗚
呼美終必復禮無不答昔爾之勤勞如彼今吾之寵飾
如此君臣報施可謂兩臻其極焉爾靈有知欽我追命
可加贈太尉

韋審規可西川節度副使御史中丞李虞仲崔戎

姚向溫會等並西川判官皆賜緋各檢校省官

兼御史制

白居易

敕西川曰益部地有險府有兵礙戎屏華號為難理故
吾命文昌為帥長俾鎮撫焉次命審規為上介俾左右
馬又命虞仲戎向會等為庶寮俾咨度焉進言者謂文
昌賢而審規輩才以才佐賢蜀必理矣夫輟三署吏贊丞
相府假憲官職加臺郎暨一命再命之服以遣之其於
張大光榮與四方征鎮之賓寮不侔矣爾等苟佐吾丞

相以善政聞使吾無一方之憂吾寧久遺汝於諸侯乎
爾其勉之可依前件

授鄭覃給事中制

白居易

勅給事中之職凡制勅有未便於時者得封奏之刑獄
有未合於理者得駁正之天下冤滯無告者得與御史
糾理之有司選補不當者得與侍中裁退之率是而行
號為稱職故不專於掌侍奉讚詔令而已具官鄭覃清
節直行正色審詞先臣之風藹然猶在自居首諫益勵

謬擢領是職必有可觀亦欲天下聞之知吾獎骨鯁之臣來諫諍之道也

授柳公綽吏部侍郎制

白居易

勅京兆尹兼御史大夫柳公綽長吏數易為害甚多邇來都畿未免斯弊或苛急而人重困或懦弱而姦不息得其中者其公綽乎細大必躬親剛柔不吐茹甚稱厥職惜而不遷然智者常憂忠者常勞亦非吾以平施御臣下之道也尚書六職天官首之辯論官材澄汰流品

比諸內史選妙秩清詢衆用能無易公綽爾其飭躬承命以裴王崔毛為心苟副吾言用稱乃職

授韋覲給事中庾敬休兵部郎中知制誥制

白居易

易

勅職之要莫先於駁正文之選莫難於司言將使朝綱有條朕命惟允在二者得人而已具官韋覲精微專直通乎事典可使平奏議而坐右曹庾敬休溫裕端明飾以詞藻可使書誥命而立西序而輪轅鑿枘各適所宜

夫惟刺史守列城卽官應列宿選任倚注非不榮重然
吾左右前後方求正人如覲敬休不宜疎遠亦猶有聲
之玉無類之珠不置佩服之中掌握之上皆非其所也
宜自敬重無忝吾言

第十二妹等四人各封長公主制

白居易

勅古者帝子下嫁必使王公主焉近代或有未笄年而
賜湯沐者亦加公主之號以寵重之第十二妹等先皇
帝之子也比朕之子宜加等焉故當幼年各封善地咸

命為長公主未及釐降先開邑封所以慰太后慈念之心表先帝肅雍之訓亦欲使吾孝理之道敦睦之風自骨肉間以及天下可依前件

授李建吏部員外郎制

白居易

勅六官之屬選部郎首之歷代以來諸曹郎之中擇其踐歷久考第高加以有器局律度者遷焉今之選任亦由是矣兵部員外郎李建文行才理公勤課績可以具美宜居厥官歲調方殷勉勤爾事

授張元夫禮部員外郎制 白居易

勅殿中侍御史張元夫官有秩清而選妙者其儀曹外郎之謂乎凡殿內御史雖文才秀出功課高等者滿歲而授猶曰美遷有如元夫連膺二選歷彼踐此僉以為宜况怒飛青冥翔集禁陛由茲去者十八九焉汝知之乎思有以稱

授李虞仲兵部員外郎崔戎戶部員外郎制 白居易

易

勅具官李虞仲崔戎等去年春朕憂西南事授丞相文
昌鉞往鎮撫之次選郎吏有才實如虞仲輩者往贊理
之故其制云苟佐吾丞相以善政聞寧久遺汝於諸侯
乎今蜀政成矣蜀人久矣是汝輩職修事舉而奉吾詔
書甚謹也前言在耳安可弭忘並命為郎主吾信實

授張籍水部員外郎制

白居易

勅登仕郎守國子監博士張籍文教興則儒行顯王澤
流則歌詩作若上以興教流澤為意則服儒業詩者宜

稍進之頃籍自校秘文而訓國胄今又覈名揚稱以水曹郎處焉前年以來凡歷文雅之選三矣然人皆以爾為宜者豈非篤於學敏於行而貞退之道勝邪不與之寵名何以獎夫不汲汲於時者

授許季同秘書監制

白居易

勅大理卿許季同國朝以來有劉德威張文瓘唐臨為大理卿有魏徵虞世南顏師古為秘書監則設官之重得賢之盛人到於今稱之今季同以明慎欽恤理刑獄

以文學博雅掌圖籍由廷尉而長祕府論者榮之宜自重其官自遠其道又思與劉張唐魏虞顏為比不亦自多乎

授沈傳師左拾遺史館修撰制

白居易

勅京兆府鄆縣尉沈傳師庶職之重者其史氏歟歷代以來甚難其選非雄文博學輔之以通識者則無以稱命令茲命爾其有旨哉昔談之書遷能修之彪之史固能終之惟爾先父嘗譔建中實錄文質詳畧頗得其中

爾宜繼前志率前修無忝爾父之官之職

授韓愈比部郎中史館修撰制

白居易

勅太學博士韓愈學術精博文力雄健立詞措意有班馬之風求之一時甚不易得加以性方道直介然有守不交勢利自致名望可使執簡列為史官記事書法必無所苟仍遷郎位用示褒升可依前件

授王建秘書郎制

白居易

勅太府丞王建太府丞與秘書郎品秩同而祿廩一今

所轉移者欲職得宜而才適用也詩人之作麗以則建
為文近之矣故其所著章句往往在人口中求之輩流
亦不易得帑藏之吏非爾官也而翱翔書府吟咏秘閣
改命是職不亦可乎可秘書郎

授王輔元左羽林衛將軍知軍事制

白居易

勅國家設十二衛猶漢之有南北軍而左右羽林尤稱
親重自諸衛而移領者謂之美遷左神武將軍王輔元
生勲閥之家通吏理之事佐我臨郡率著能名可以掌

勾陳而護建章備巡警而嚴羽衛大將軍事假而行之
宜勵初終副茲寵任可依前件

授姚成節右神武將軍兼知軍事制

白居易

勅具官姚成節嘗為天平軍裨將當劉悟之立忠勲也
謀成事集爾有助焉雖授一城未足酬獎况聞信厚勤
恪宜於爪牙肘腋間居之昔漢文帝以宋昌忠勞擢拜
將軍使掌環衛今吾用汝猶前心也環拱之職得不勉
與

授李諒泗州刺史兼團練使當道兵馬留後兼侍

御史賜紫金魚袋張愉岳州刺史制

白居易

勅扼淮壓湖之列城曰泗與岳舟車會焉軍戎屯焉是
二郡守不易為政先是守領者多會有故歲時罷去長
吏數易人必重困宜擇良二千石救而養之以諒自登
城長訖尚書郎中間又再為州牧三宰劇縣皆苦心卹
隱煦嫗及物操刃決滯晷晷有聲而愉亦學古入仕甚
自修飾河西有政次於諒焉故命愉守岳命諒守泗仍

以戎職留事憲簡章綬一加於諒諒其聽之哉異日吾將以重官劇職處爾爾安得不副吾所急用爾所長更宜以難理之郡自試耳各依前件

授倉部郎中制

劉禹錫

勅周制倉人以辨於邦用廩人以待乎匪頒後代或均輸或平糴皆周官倉廩之職也於戲王者藏於天下吾何私焉收斂以時儲蓄必謹俾夫凶荒無患貧富克均吾咏京坻之詩勿守區豆之限

授主客郎中制

劉禹錫

勅漢制尚書郎四人一人主營部成帝又署客曹主外國戎狄事皆今主客之任也其後或東西列職左右分名統彼行人之家綏其外臣之務朝聘則定位宴會則辨儀穆我四門深於九譯用委藁街之政克資粉署之賢

授鄭朗等左諫議大夫制

李德裕

予欲左右前後皆得正人朝夕交戒儆予之闕所以分

左右而備箴諫也思見大儒骨鯁白首耆艾論議通古
今喟然動衆心所以增其秩而厚其祿也具官鄭朗等
皆以貞正守道列於左掖從容諷諫每竭嘉猷况朗璜
近因陞見乃能庭爭執以言責本於忠誠昔峻坂乘危
緩絲攬轡期門近出次况當車增主之明二臣之力我
求端士用繼前良期爾盡規致予無過勉思厥職無忝
優思

授鄭處晦職方員外郎兼侍御史知雜事制

杜

牧

勅具官鄭處晦御史中丞韋有翼上言曰御史府其屬
三十人例以中臺郎官一人稽叅其事以重風憲如曰
處晦族清貴能文博學人倫義理無不講求朝廷典
章飽於聞見乞為副貳以佐紀綱以爾處晦嘗居內庭
草具密命自以疾去於今惜之頗俞其言如我自得
有翼為爾之知己予為有翼之德隣上下交舉豈有私愛
勉修職業所報非一

授竇弘餘加官依前台州刺史蘇莊除鄧州刺史

等制 杜牧

勅具官竇弘餘蘇莊等南郡盜作而蕭育拜河南政美而寇恂留為人擇官因重而撫考於兩漢行古道也弘餘廉使上言父老有請其為政也長育多方惠訓不倦凡設教令皆有科旨莊任南康悉心為理謹身律下節用愛人南陽古都近者小擾臨海越俗尤惜良吏就加起拜各叶所宜仕至二千石可庇人矣無異文律不自

貴重副疲羸之望者須念終始坐狂愚之罪者勿理深
汚各膺寵祿無忝分寄

授李承慶鳳翔節度副使馮軒義成軍推官制

杜

牧

勅具官李承慶等以文學升名於有司以才能入仕於
官次諸侯辟之以佐於賓席天子用之以升於朝廷次
第等級大小高下亦與古之鄉舉里選考功試言無以
異也爾等皆吾卿大夫之令子弟也清風素範克肖家

聲屬詞成章能取科第既為知己皆為才人賢觀與遊
達視所舉今爾賓主兩皆得之義則進否則退無為美
疚以求苟容可依前件

張德翁除歸州刺史李承訓除福昌令審矩除陽

翟令制

杜牧

勅具官張德翁等德翁承訓審矩為天子之守臣作百
姓之長吏仕而至此斯亦達矣匹夫為善人猶則之守
令所為誰敢不化詩曰爾之教矣民胥效矣可不勉之

可依前件

契丹賀正使大首領等授官制

杜牧

勅具官討魯等天子有道守在四夷爾今來朝予亦增愧綏之玉帛榮以班秩宜懷恩寵永保封疆

授劉全禮等七人並除內侍省府局丞置同正等

制

杜牧

勅具官劉全禮等置在傍側皆有才能既歷歲時合當班秩各宜敬恭職祿不懈忠勤可依前件

授秘書少監賜紫盧光啟守中書舍人制 錢

珣

勅西省設官之重實代吾言故修禁之章漏泄居其首

而稽緩次之受選者率用靖默專敏之士然後若

疑作爲

得具官盧光啟勵精不急處默有倫定志而靜專其謀

好古而敏求其要總是四善謹於一心則攻學與文嘗

試之於禁闥矣能於散地自安素風不去乃資公論復

典訓辭夫入官惟勤執事惟敬苟視禁以無犯則立身

而有章行之克終利亦焉往可依前件

授考功員外郎賜緋魚王鉅駕部員外郎知制誥

制 錢珣

勅某官某夫舉典申命以進退在位之士而指其否臧
兼儆百職者本乎聖人之法言也法言之不為浮言而
已知言之士過實必羞因使出辭當能近法鉅積中有
美欲昧而彰永惟季父令名常恐所承不似百川學海
進則至焉吾欲激而成之是以擢居禁省往司明誥罔

畔法言至不漏不踰茲為能矣可依前件

授趙昌翰考功郎中制 錢珣

勅具官趙昌翰國之舊章繫會府者僅廿六七坐曹郎
見隆不舉焉用官為而善最之法所隆尤重非精材強
力安能舉之昌翰以名家子實修自整為縣罷去翛然
自安公卿有知己之門車馬無致身之跡善養材用益
聞精強是以考績處之且欲明試於爾噫擇名曹置名
士吾不知設官之始獨為人乎如或深思必將召寵可

依前件

授戶部巡官秘書省校書郎楊玠武功縣尉充集

賢校理制

錢珣

勅具官楊玠士子由科而進得為館殿吏者俯視華資
如拾地芥然而道不益固名不益彰則朝之華資其可
俯視而拾之哉玠質秀氣實自立頗強窺其所為誠在
於道固名彰之本也今既列書殿仍懷令圖奚患華資
不能俯拾可依前件

湖西節度使錢鏐燕國夫人吳氏進封晉國夫人

制錢珣

勅齊之壁司徒武力之臣也其妻有禮尚獲錫地於君
今師長萬夫提封千里內資淑媛助我勲侯國進大名
是惟舊典具官錢鏐妻燕國夫人吳氏肅雍之美歲戒
不忘聞鷄鳴而致敬事姑諷鵲巢而思齊有德輔成功
烈諒屬柔明爰舉寵章載加常等勉承膏澤以耀閨
門可依前件

授董禹左諫議大夫制

薛廷珪

勅朝廷具位之臣得直言天子過失太平之基也矧司
我諫議列吾軒墀啓乃心而沃我心盡爾言而攻我過
眷求之道時惟難哉具官董禹疊中詞科優有藝文西
漢故事甘泉遺儀聞其討論多所詳悉逮事先帝頗揚
直聲徵還周行歷踐臺閣靡所附麗能精典墳公論推
其才直鄉校言乎淹卹今擢爾為諫議大夫置朕左右
勉揚厥職徃副旁求夫立肺石挹獸樽扶將顛祛未寤

在履正直務去將迎爾或推公朕豈憚改書紳銘座服
我訓詞佇稱人情勿孤朝獎

授侍御史沈栖遠右司員外郎殿中張玄晏都官

員外郎制

薛廷珪

勅具官沈栖遠等由御史屬為尚書郎選擢之重難踐
歷之清切所以廣毓材之道也以栖遠清白嚮正藝實
揚名魯人將以為木鐸太一下傳其洪範石渠鉛槧諫
署淹翔動靜有常職業惟允以玄晏詞無枝葉道有污

隆履君子之中庸練國朝之故實直方之氣僉論多之
文藝之優前輩高許而皆乘驄衣繡為我憲臣指佞埋
輪恪居官業疇其久次爰俾序遷勉思伏奏之勤無忘
率職之重

授崔義進侍御史趙光喬鄭祁殿中丞李皎監察
等制 薛廷珪

勅崔義進等吾近以風憲之任委諸名卿中外肅然佇
其振舉果於掄選能掇菁英且言澄澹秉彛進退由禮

義進之修整也無怠句牆岸山立句時情藹然句光
裔之峭直也不黨句英華發外句清勁積中句祁之蘊
蓄也無多謝於前修句聞善若驚句覆篑不止句皎之
砥礪也頗自強於遠概句皆克荷先訓來為聞人俾之整
肅周行懲艾風俗觸邪指佞庶有可觀句爾當其才朕愈
其請各賜履職懋對天休可依前件

授右威衛上將軍契苾璋威衛上將軍制

薛廷珪

勅具官契苾璋尚齒酬勞固聞於茂典念功求舊式訓

於後生朕嘗因坐朝周視百辟有義冠擔珪華髮承弁
鷹揚鶚立於墀廡之上者一旦便殿詢於宰臣且曰衛
將軍璋也夙號良將實著軍功嘗擁節旄兼聞善政自
處之環衛委以腹心闢彼汙萊盡作文王之囿化其士
卒皆為君子之營而耆艾服勤班資不稱積薪之歎達
我聽聞俾昇上將之尊不假三師之貴吾於爾輩無吝
優恩勉服軒裳共致寧謐

授太子賓客王牘等諸王傳制

薛廷珪

勅具官王牘等朕聞王者之子在襁褓中置貳公以教訓之由古道也我思成人以來邁此多難師訓之義蔑焉闕聞南面稱尊愧於寡昧由是言念諸子用疚厥心因擇正人為之傳導今丞相言爾牘等並老於文學雅有德行明君臣父子之道知禮樂詩書之源可使高步承華入參望苑琢磨羽翼朕有冀焉或授正卿或加峻級宜旌優異往傳童蒙邪蒿鮑魚勿俾登俎胄筵講肄為惜分陰使其知東平為善之規喜王褒洞簫之賦承

萬代之業固磐石之基斯賴於老成人也可依前件

授楊鎰西水縣令張廷濟永清縣令盧軫新政縣

令孫球下邳縣令等制

劉崇望

勅昔魏郡十五城獨繁陽有異政漢史書之以其為縣之才未易得也今我擇官憂人之際一朝以難得之才待鎰等四子其何如哉將責試功亦宜申命為政如御不可改轍而行為政如農唯在勤思其事無或窮人使為盜也書稱以庸本朝旌賞遽以印綬光命之球蓋延

徐師溥之所舉乃為之酬當務其實可依前件

授康君立等諸州刺史制

李璣

勅康君立等夫文吏以儒術自進而牧人養物固其所也而論者猶或嘉之而爾等各以軍功達於郡政可謂難矣然武有七德而安人和衆在焉得非皆達其義耶深惟勸能之方遂允為真之請可依前件

許州節度使王蘊母趙氏進封楚國太夫人制

李

璣

勅古之為將言有老母而三戰三北者朕每讀其書而
非之夫為將者皆然則何以同在三之義勵士衆之心
而逃無勇非孝之譏哉苟如斯亦其母之未賢爾忠武
軍節度使王蘊方榮色養既孝而忠委以節旌遂稱名
將賈勇而力過投石臨陣而義不聞金得非其母趙氏
賢以善訓邪豈特築朱序之城寧陳嬰之族而已宜加
大國之封以助南陔之慶可依前件

文章辨體彙選卷十四

欽定四庫全書

文章辨體彙選卷十五

明 賀復徵 編

制四

授高平郡王重規司屬卿制

唐李嶠

鸞臺百工惟時必在推擇九族既睦仍資敦叙具官重
規宗室儀表衣冠領袖有姬旦之藝兼劉蒼之善出居
連帥功名著於兩河入奉鈞陳誠款申於八校本支望

重河海職隆宜輟掌於魚鈴俾專司於鱗族

授崔融著作郎制

李嶠

鸞臺具官崔融長才廣度瞻學多聞詞麗揚班行高魯
史外臺美其方正中省推其良直永言司典尤俟得人
載筆西垣既藉微婉紬文東觀更資博通宜昇著作之
庭兼踐記言之地

封衡陽郡王成義為申王等制

蘇題

門下古者帝王受命以臨萬國子弟建封用尊五等其

所由來尚矣具官成義等敦詩執禮本仁祖義名教之
樂得自幾深溫良之容發於忠孝晨趨魏闕則望掩軒
霞夕賦曹園則思含澄景朕祇奉厯數旁稽載籍克輔
王室所謂通邑大都俾為唐藩故能帶河礪岳分膺往
命咨爾眷歟可依前件

授宋王成器太子太師制

蘇題

門下孟侯之禮雖歸於冢弼泰伯之風實尚於高節具
官宋王成器幼而聰惠長則溫仁禮樂同歸質文相半

孝以為政每用因親忠而立誠所期尊主故能樂於為
善好在服儒占蟻穴以探徵登省臺而成賦自奄有梁
宋作藩邦家其儀孔臧其德可大朕之元子當踐副君
以隆基有社稷大功神人僉屬由是朕前懇讓言在必
行天下公議誠不可奪爰符立季之典庶叶從人之願
况別為九州必資於牧伯貞夫萬國先行於博師式副
僉諧之求仍光不拜之寵

授張說中書令制

蘇頌

門下咸有其德委郎廟之元宰知無不為歸掖垣之成

務張說舍和育粹特表人師懸解精通見期王佐立言

布

唐詔令
作希

文武之用定策勵忠公之典才冠代而不有

功至大而若虛自頃弘益時政發揮王道萬事必理一

心從人以觀其獨伯起慎於四知常得其貞叔教謹於

三省

詔令
作者

故能深而不竭久而彌芳宣大號於紫宸潤

昌圖於清禁我憑柱石爾作鹽梅正名之謂羣議斯集

可授中書令

授韓休起居郎制

蘇題

勅具官韓休理識清暢襟靈夷雅探學精微屬詞婉麗
甲科對策嘗副求賢左史記言用觀書法

授李懷讓給事中制

蘇題

黃門具官李懷讓直方自守貞獨不羣理可析於毫芒
文可成於藻繪雖手揮繁縵而心寄閒遠絲綸所屬嘗
推起草之能駁正是司更接遊蘭之寵

授薛稷諫議大夫制

蘇題

門下具官薛稷弈代雄詞身濟其美光時雅量士慕其
風故能懸帳絕倫昇堂觀興掖垣密勿字列黃練仙闥
從容文飛赤管箴闕之任惟賢是擇俾登才子式寵諫
臣

授劉知柔尚書右丞制

蘇題

門下天臺管轄爰正紀綱人望僉宜方膺授受具官劉
知柔時行推美舊德歸高明暢襟情閒華風表蹈典墳
之芳潤總詞賦之笙簧慮常密於在公迹自勤於為政

萬人登數已聞書版之精六官揆才更俟彈珠之妙

授劉幽求左僕射制

蘇題

門下尚書佐理四方取則端揆成務百工是師非允具
瞻孰康庶績封州流人劉幽求風雲玄感川嶽粹靈學
綜九流文窮三變義以臨事精能貫日忠以成謀用若
投水茂勲立艱難之際嘉話盈啓沃之初存謹直以不
回為姦邪之所忌釁萌頗露譖端潛發元宰見逐讒人
孔多既誅羣兇方宣大化期間政於經始載登賢於夢

卜

授張仁愿兵部尚書制

蘇題

黃門名遂身退則聞告老優賢尚齒不忘求舊具官張
仁愿有將相之才樹忠公之績入稱三傑帷幄所以運
籌出總六師塞垣由其卧鼓懸利器而御物自中於桑
林推素心以得士更成於李徑故能居室而應在邦必
聞洎養疾歸休辭榮及禮用旌渭濱之兆空想潁陽之
間乞言繫賴寵德攸宜佇增題劔之榮更遂揮金之樂

可光祿大夫行兵部尚書

授李入刑部尚書制

蘇題

黃門王命司寇汝作士師允迪政刑旁求望實具官李
入恒碣之寶衣冠之華業總四科才抱九德為邦理要
洞入精微當代詞雄居成準的忠義得在公之體清修
稟行己之用紫泥掌誥雖密王言黃沙定罪是懸人命
眷茲欽恤尤賴簡孚俾回迹於西垣宜正名於北斗

授盧藏用檢校吏部侍郎制

蘇題

勅具官盧藏用含和育粹直道正身學貫儒墨詞精比
興風塵之外獨秀瑤林清白之中常懸冰鏡自四年掌
誥九品作程峻而不離重輕咸當簡而能要浮競斯遠
刀尺之委銓衡已歸特選周才更符僉望

授王丘主爵郎中等制

蘇題

勅具官王丘學思文華精而典麗韋虛心神清氣勝敏
以甄通或刈於楚翹先有司之課績或提其綱轄肅諸
曹之填委爰旌二妙宜叶再遷丘可守尚書主爵郎中

虛心可守右司郎中

授李懷讓兵部郎中制

蘇題

黃門具官李懷讓直方在心清而轉勁通明應務吏必兼文故能譽滿簪纓望華臺署鵷鳩作士雖參聽棘之言司馬訓兵重踐握蘭之任

授宋璟御史大夫制

蘇題

黃門三台副職百寮之師紀綱是任莅事惟能具官宋璟含純粹之德秉清剛之氣學研精以辨政文體要以

經遠吉人之寡敕言有訓君子之慎擇行無違正色而
自具陽秋立誠而不僭風雨必能靜專動直獻忠納規
常聞沃心之任靡憚犯顏之情使其坐以鎮俗毅然當
朝則不能者退不仁者遠王臣蹇蹇懦夫有立俾光天
憲式副人瞻

授李懷讓御史中丞制

蘇題

黃門貳彼副相一其三獨不任宏才孰膺高選具官李
懷讓直方孤聳清迥特立祇服文儒克修典禮持疏網

而不漏常嫉惡以闢邪泛虛舟於自然不近名而過實
必能去煩苛之小節知憲章之大體允符羣議光踐
中司

授李元紘度支員外郎制

蘇頌題

勅具官李元紘清真不雜恬雅自居部劇著於祠曹養
能傳於宰邑頃聞出佐方馳日下之聲爰佇入官猶屈
黃中之美宜遷郎位以寵相門

授尹思貞御史大夫制

蘇頌題

門下國之副相位亞中台自非邦直孰司天憲具官尹
思貞賢良方正碩儒耆德剛不護缺清而畏知簡言易
從莊色難犯徵先王之體要敷祗必陳折佞臣之怙權
拂衣而謝故以事聞海內名動京師鷹隼是擊豺狼自
遠必能條理前弊發揮舊章宜承弄印之榮式允登車
之志

授張遊侍御史制

蘇頌

勅具官張遊清方自居專直上撓秋風始擊每勵鷹鷂

歲寒後凋斯見松柏國儲在於紅粟王憲持於白簡式
寄人天之重更聞臺閣之遷

授鄭溥殿中侍御史等制

蘇頌

勅具官鄭溥等志蘊公忠才兼學行守文法以明練循
憲章以清直神羊共觸常聞避馬之雄夕鳥明飛俾叶
遷鶯之舉可依前件

授陸餘慶大理卿制

蘇頌

黃門法者天下所共廷尉天下之平選衆甄才惟明克

允其官陸餘慶早回翔於近密又踐歷於中外雍容文雅自然素徵清商蕭散風華莫不瑤林瓊樹必當和而不撓貞則有恒正罰金於後人戒刻木於前吏念茲欽恤深可哀矜宜修白雲之典俾靜黃沙之職

授陳正觀將作少監制

蘇頌

黃門具官陳正觀蘊器沈敏懷才雅實在公有甄綜之能臨事有靖恭之譽頃者荆岑作鎮楚望班條時許仁明俗稱威惠五材是用百工分職爰考掄材之績宜膺

梓匠之司

授李延昌左金吾衛大將軍制

蘇頌

黃門兵戈之容是憑於師律興馬之飾允屬於徽巡自
匪周才孰當茲任具官李延昌倜儻為用堅剛立誠學
優典墳言綜韜略賈勇聞義則輕於九死好謀盡忠則
隱如一敵自膺刺姦之寵雅叶彈違之務正名不拜何
以光於執金教戰或忘何以勵其投石宜踐迹於中尉
俾疇能於亞夫

授崔秀太子左庶子制

蘇頌

門下古者官宿其業吏不數變將欲觀其終始因以別其能否若用捨非當遲速不倫是開趨競之門豈曰和均之道宗正少卿崔秀等名迹早著朝廷所推各勅一官已經四稔誠器能有用久次當遷宜副僉諧俾膺並命且承平日久從仕者多必憑考績方議進轉但須慎守豈滯其能如或躁求是招其累速則不達謙而必亨凡今庶僚宜悉朕意可依前件

授白知慎河南少尹制 蘇頌

黃門具官白知慎博觀墳史祇奉程式吏道尤精公心
不轉郎官起草增其應宿之華匠者運斤主其乘風之
妙任能結約省費馳聲爰瞻上洛之都宜亞尹河之寵
可授河南少尹

授鄭璿河南縣令制 蘇頌

黃門具官鄭璿士門雅望名教是先吏道通才聲塵自
遠嵩邱帝宅周漢王都宜迴起草之能佇息鳴桴之聽

可授河南縣令

授郭虔瓘潞國公兼食邑實封制

蘇頌

黃門聞鼓鼙之聲者則思於將帥裂土茅之賦者則念
彼勲庸具官郭虔瓘忠將超倫智謨絕等決勝千里懷
孺子之兵符通知四夷有老臣之戎律往者鎮于荒裔
獨守孤城煮弩而其人益堅引弓而彼衆不敵故得愛
子染鏑名王解辯窮廬掃地而將空沙漠聞風以歸附
功則茂矣朕實體之宜誓河山開其井邑

封姚崇妻鄭國夫人制

蘇頌

黃門具官姚崇妻滎陽郡夫人鄭氏滎河地緒簪組家
聲輝相門以才淑冠邦族而婉嫕蘭儀蕙問式備言容
習禮聞詩載兼圖史金契作輔爰開土宇之封石窀承
榮宜表珩璜之盛

文章辨體彙選卷十五

欽定四庫全書

文章辨體彙選卷十六

明 賀復徵 編

制五

封張嘉貞河東縣男制

唐韓休

任事而爵古之彛訓論功以封朝之通典具官某忠肅
恭懿宣慈敏達涵精明以毓德體文武而成器自光帝
載昭宣廟謨鼎味用和台階增峻事君有犯而無隱奉

國以公而滅私持其憲章式是軌度既邦教有叙亦王
猷以穆頌統軍政爰城朔方用底其績未酬厥賞固宜
命以圭社崇其禮物俾楚臣授邑克表寢丘之制漢道
優賢更叶平津之美

授杜暹等侍御史制

韓休

勅具官杜暹禮樂之器直方効節馮宗文儒之業堅正
在心咸以清公副茲望實風霜既肅臺閣推美持我邦
憲載穆時談俾遷周史之能更舉楚冠之任並可侍御

史

除韓休黃門侍郎平章事制

張九齡

勅思致雍熙聿求元輔久勞夢寐延彼周行具官韓休
蘊道弘深秉德經遠清裁可以範物素行可以律人一
自登朝備聞體國志存公亮誠著始終而羽翼朕躬金
玉王度人望是在朝選無踰宜拜命於瓊闈俾兼和於
鼎寶

授李彭年吏部侍郎制

孫逖

門下綜彼天秩亞於大宰易人之舉選衆尤難尚書兵部侍郎李彭年人望時秀雅才清識德以全誠文而致用操必割之器遇時事無前持不轉之心在公庭難奪必能數求名實底慎銓衡宜輟七兵之務俾修九流之法

授楊綰禮部侍郎制

賈至

門下鯨鯢初懸理化未洽思敦馳騫之俗必弘廉退之風具官楊綰質稟天和才優大雅理能自暢學不為人

自委身於周行孤立於中道喜愠莫形於顏色外物無
得而親疎聲聞日高志致彌遠固足以抑揚雅俗弘獎
素風宜貳職於南宮仍屬詞於東觀俾難進之夫增氣
干仕之子知慚彫斲澄源朕志斯在

授裴倩度支郎中制

常袞

勅具官裴倩達識含精長才致遠秉彝尚晦金璞自明
當劇居難干將獨割周歷臺閣綢繆藩鎮休聲異政亦
克有終底慎財賦之殷校計軍國之用得專其任爰舉

舊章佇爾發揮以之贍濟

授崔炎監察御史制

常袞

勅權知絳州絳縣令崔炎慎學潤身工文飭吏錯薪刈
楚竹箭有筠蒞事咸許於宓生遺風尚傳於絳老公才
可擢朝聽用章宜甄避蝗之美式踐栖鳥之列可監察
御史

劉滋崔造齊暎平章事制

陸贄

朕嗣位君臨精求理道小大之務靡不經心日慎一日

於今八載教化未洽烝黎未康因之以甲兵繼之以災
沴斯固鑒有所不至慮有所不周予心浩然若涉深冰
思所以匡我致理助我官人宣其澤而四方以寧執其
要而百工式叙允是大任其維輔臣夢想之懷敷求俊
乂察言而觀行因事以考能周行之中乃得良弼權知
吏部侍郎劉滋操履貞清介然自守居能慎獨重不違
人析理究其精微勵學探於奧旨守給事中賜緋魚袋
崔造性合道要誠通化源適時有成務之才事上懷匪

躬之節蘊蓄器業居為名臣中書舍人賜紫金魚袋齊
暎修己以立自明而誠體賢人可大之規用君子時中
之道虛能受澤清通不流維滋之直方可以激風俗維
造之體度可以振條綱維暎之精深可以該物理我有
大典爾其叅之懋昭厥猷勿替休問

授劉悟檢校司空幽州節度使制

元稹

門下朕聞將星明則英豪用靈旗指則妖祲銷勁草可
以受疾風盤根然後見利器苟非處劇何以用長況幽

并少年燕趙奇士居常以紫騮自騁失意則白刃相仇
將領斯難是先才傑具官劉悟天與忠誠人推敬讓蘊
孟賁之勇不以力聞避廉頗之強使之心伏是以居危
邦而智免臨大節而功高嘗見委於先朝屢作藩於右
地朕以遼陽巨鎮自我底寧姑欲撫之以仁然後示之
以禮而守臣嬰疾幕吏擅權撓政行私虧恩剝下過為
捶楚妄作威稜不均饗士之羊但養乘軒之鶴致茲撓
變職此之由不有將材孰懲兒戲敷求朕志深謂汝諧

是用拔奇式冀宣力帖以亞相寵之上公俾光十乘之行以壯三軍之氣

第七女封公主制

元稹

門下長女等抱子弄孫之榮貴賤之大情也朕以四海奉皇太后於南宮問安之時諸女侍側螽斯之慶上慰慈顏鳴鳩之仁內懷均養雖穠華尚少出閣未期而湯沐先施分封有劇宜加美號以表令儀可依前件

授張奉國上將軍皇城留守制

元稹

勅環太微諸星有上將次將之列所以拱衛宸極誰何
不若予置上將軍以禦侮率是道也前皇城留守張奉
國謙能養勇明以資忠卑飛翕翼於未擊之先痛心疾
首於見危之際常擒狡獪克定妖氛行賞計功屢昇榮
級朕愛其忠厚難以外遷稍移婁胃之間不失爪牙之
任為吾守禁勉爾干城

馬總准制追贈亡父請回贈亡祖制

白居易

勅夫積善者慶鍾於後顯揚者光昭於先而總貴為邦

君賢為國士荷貽謀之訓用率義之文上獻表章有所
陳乞朕念其祖德褒以臺郎所以復陳實必興之言慰
范喬泣涕之思庶使幽顯兩無恨焉

薛伯高等亡母追贈郡夫人制

白居易

勅某夫人某氏等始播婦儀終垂母道教其令子為我
良臣而皆茂著才名榮居爵位永言聖善宜及顯揚俾
追啓邑之封式表統家之訓可依前件

夏州軍將二人授侍御史制

白居易

勅某官某等早稱武藝久隸軍麾稟命元戎服勤王事
或千里移鎮從為紀綱或十乘啓行倚為肘腋繇歷年
月積成勤勞不加寵榮何勸忠効並命憲職宜敬承之
並可兼侍御史餘如故

贈裴度太師制

李德裕

勅堯之舊臣伯益顯庸於舜禹周之元老召公流美於
成康永惟其人是屬良相裴度始以謀策除害佐烈祖
之中興終以忠貞立朝毘累聖之鴻業經緯之志華皓

不衰功勳爛然圖史輝焯奸邪所忌艱晚於時暨氛霧
既開魚水將協條風孰見其喜愠零雨皆美其來歸未
踐明廷遽嬰沈疢威鳳莫翔於舊沼虛舟長往於夜川
殂謝之初朋黨異議贈典不稱人情鬱然屬告類上玄
煥流大號載懷先正宜有褒崇寵既極於維師恩有加
於在昔豈必望鄴侯之壘方念茂功過梁道之祠乃思
遺美以茲為勸可不務乎

贈李絳司徒制

李德裕

朝有正人時稱令德入參廟算出總師千方當寵任之
臣橫罹不幸之酷殄瘁興歎縉紳所同具官李絳神授
聰明天賦清直抱仁義以希前哲立標準以程後來抑
揚時情坐致台輔佐我烈祖格於皇天杖鉞宣風聯居
樂土乘軒鳴玉嘗極清班先聲而物議皆歸不約而羣
情自許漢中名部俾遂便安而變起不圖禍生無兆殲
良之慟聞訃增傷是極哀榮用優典禮三公正秩品數
甚崇表式異恩以撫沈痛可贈司徒仍令所司擇日備

禮冊命

贈故蕃維州城副使悉怛謀制

李德裕

勅兵家之法地有必爭遠則漢氏之得陰山匈奴慟哭
近則張愿之城河外朔方底寧乃眷維州實為險隘有
金湯之固居襟帶之衝沒為戎疆垂六十載故蕃維州
城副使悉怛謀嘗解髮獻其壘垣議臣託以和盟沮
其誠款尋令東縛歸戮戎庭彼獲甘心幾無噍類昔常
山臨代為金趙之寶符河西絕羌斷西戎之右臂弃茲

要害用長寇讎言至今蜀人言必流涕豈陳湯之專命由
匡衡之廢忠言念始謀久罹幽枉爰加寵贈用慰貞魂
授狄兼謨兼益王傳鄭東之兼益王府長史制

李

德裕

勅古者聖人之教子也皆妙選天下之端士以衛翼之
漢代梁王好書則以賈誼經緯之才推明其志淮陽好
政則以立成禮讓之節鎮靜其浮前王令猷百代良法
况朕建立元子錫之粵區朱邸初開黃髮是憲以兼謨

慷慨納說有袁絲正席之忠以東之取舍俟時有貢禹
彈冠之操皆行不苟合誠無暗欺歷職有聲居正無撓
舉其素行擢在首僚爾宜廣德義之風明孝愛之道俾
其嚴於問寢敬不絕馳化與心成中道若性服我休命
可不慎歟

授元晦諫議大夫制

李德裕

勅昔汲黯薄

一作為

淮陽守願出入禁闥補過拾遺則諫

諍之任實資諒直我求其比今得正人吏部郎中元晦

往在內庭嘗感先顧奮發忠懇不私形骸伏俯青蒲至
於雪涕數共工之罪不蔽堯聰辨垣平之詐益彰文德
近因旌別邪正宰弼上言以魯公藏畧莫如寘革於左
右漢后輯檻孰若列游於公卿是用命爾登於文陛其
副我寵擢不替初心勿沽小名以枉大節勉服官業期
於有終可諫議大夫

授徐商禮部員外郎制

李德裕

勅具官徐商于公以容駟高門虞氏以升卿名子其所

全活不聞大賢猶誠感幽神慶流苗裔矧乃祖徃以淑
問嘗為理官屬政在呂宗謀克王室將相陷辟忠良受
誣而深念羣獄之寃固拒詔使分別楚囚之濫自履危
機義激命輕仁為己任有是陰德宜覃後昆爾風度和
粹文詞溫麗列於清憲雅有貞標旣旌先正之忠宜舉
賞延之典勉修官業無替家聲

授盧懿吏部郎中制

崔蝦

勅河南少尹盧懿總天下之缺員必先閱於吏曹郎然

後達於銓官自非神機穎利識用周密則不得備於斯
選也以爾詞鋒絢練門緒清華儒席許其溫恭士林推
其端厚自分曹洛汭二尹三川澹於趨進之途鬱彼靜
專之操晦迹而囂浮自遠長鳴而風雨不渝是用徵還
首曹榮以題柱必能佐持衡之重任聯藻鑒之清輝勉
服官常無孤所舉可依前件

授韋博司勳郎中等制

崔嘏

勅韋博等頃以邊城命將肇建麾幢當警塵未息之時

及烽火尚明之日故於粉署妙選星郎欲以贊充國屯
田之謀佐武賢備戎之術既而賓筵有耀幕畫已多蔣
居於沙漠之中菱舍於戎旌之下亦既勞績亟更歲寒
念其裹革之誠更復握蘭之美而煥本以文學傳之吏
能克踐正途久司宗祏今以三農務急九扈才難宜遷
丞副之榮用陟亞卿之列無忘素履各服新恩可依前
件

授韋慤裴識等加階制

崔嘏

勅記曰爵人於朝與衆共之蓋以階級既崇寵榮斯異
疏封錫命列土承家爾等或才推粉澤豈惟五字之工
或任重藩垣自茂一方之績或官居象月或位應列星
或擁緹騎而分九衢或奉瑤墀而總六尚皆聿修官業
克紹家風爰因慶澤之辰更舉山河之誓宜思帶礪永
保簪裾可依前件



文章辨體彙選卷十六